

Broj:
Konjic:

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH" broj:49/06, 51/09), člana 3. stava 1., tačka 2. i člana 33. Zakona o turističkim zajednicama i unapređenju turizma u Hercegovačko-neretvanskom kantonu (Narodne novine HNK, broj: 5/2000 i 3/2022) i člana 16. Statuta Grada Konjic (Službeni glasnik Grada Konjica broj:10/22), Gradsko vijeće na sjednici održanoj dana _____ 2025. godine donijelo je

ODLUKU O OSNIVANJU TURISTIČKE ZAJEDNICE GRADA KONJIC

I-OPĆE ODREDBE

Član 1.

(Predmet odluke)

Ovom odlukom osniva se Turistička zajednica Grada Konjica.

Osnivač Turističke zajednice Grada Konjic je Gradsko vijeće Grada Konjica (u daljem tekstu Osnivač).

Član 2.

(Naziv, pravni status i sjedište Turističke zajednice)

Naziv Turističke zajednice glasi: Turistička zajednica Grada Konjica (u daljem tekstu: Turistička zajednica).

Turistička zajednica ima svojstvo pravnog lica i upisuje se u registar turističkih zajednica u (daljem tekstu Registar). Registar vodi Ministarstvo trgovine turizma i zaštite okoliša HNK-a (u daljnjem tekstu: Ministarstvo).

Rad Turističke zajednice je javan.

Sjedište Turističke zajednice je u Konjicu, a tačna adresa će se utvrditi Statutom Turističke zajednice.

II- CILJEVI I DJELATNOST TURISTIČKE ZAJEDNICE

Član 3.

(Osnivanje Turističke zajednice)

Turistička zajednica se osniva radi razvoja turizma, turističke infrastrukture, unapređenja turizma i promocije turizma na području grada u cjelini i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu s turizmom.

Član 4.

(Ciljevi Turističke zajednice)

Ciljevi osnivanja Turističke zajednice su:

- a) unapređenje općih uvjeta boravka turista kroz formiranje cjelovite turističke ponude, podizanje kvaliteta turističkih i drugih usluga, očuvanje i stvaranje prepoznatljivog i privlačnog turističkog ambijenta Grada;
- b) razvijanje svijesti o važnosti turizma, kao i privrednim, društvenim i drugim efektima turizma, o potrebi i važnosti očuvanja i unapređenja svih elemenata turističkog proizvoda, a posebno zaštite životne sredine;
- c) poticanje razvoja turističke infrastrukture i pružanja informacija turistima;
- d) promocija turističkog proizvoda u Gradu.

Član 5.

(Djelatnost Turističke zajednice)

Turistička zajednica:

- a) objedinjuje turističku ponudu Grada;
- b) upravlja javnom turističkom infrastrukturom (kulturno-historijskim, prirodnim resursima) koja joj je data na upravljanje od strane osnivača;
- c) poduzima mjere i aktivnosti na kreiranju turističkog proizvoda i turističkog imidža Grada, kao i radnje na formiranju marke turističkog proizvoda destinacije Grada;
- d) radi na promociji, plasmanu i podršci realizacije turističkog proizvoda, kao i pojedinih njegovih dijelova, vrijednosti i usluga, koji čine integralni turistički proizvod;
- e) vrši promociju plansko-projektne, plansko-razvojne i investicijske dokumentacije iz oblasti turizma i njima srodnih djelatnosti;
- f) radi na kontinuiranom inoviranju turističkog proizvoda i aktiviranju novih turističkih prostora;
- g) organizuje jedinstveni turistički informacijski sistem, sistem prijave i odjave turista i statističku obradu u skladu sa europskim standardima;
- h) sarađuje u aktivnostima i poslovima vezanim za standardizaciju, kategorizaciju i klasifikaciju turističkog proizvoda, usluga i objekata,
- i) radi na istraživanju turističkog tržišta u cilju pozicioniranja turističkog proizvoda na turističkom tržištu;
- j) prati stanje na turističkom tržištu u cilju blagovremenog donošenja odgovarajućih odluka;
- k) poduzima mjere i aktivnosti za razvoj i promociju turizma u turistički nerazvijenim dijelovima Grada;
- l) obavlja informativne poslove u vezi sa turističkom ponudom i promoviše turističke ponude Grada u zemlji i inozemstvu;
- m) sarađuje sa turističkim zajednicama u Bosni i Hercegovini, u zemljama u okruženju, Europi i svijetu;

- n) sarađuje sa putničkim agencijama vezano za turističke posjete i obilaske turističkih znamenitosti na području Grada;
- o) potiče, unapređuje, promoviše i štiti izvorne vrijednosti i stvara uslove za njihovo korištenje u granicama održivog razvoja turizma Kantona;
- p) koordinira na poslovima razvoja turizma na lokalnom, entitetskom i državnom nivou;
- r) radi na razvoju privrede, očuvanju prirodnih i kulturnih vrijednosti i unapređenju ekološke zaštite prostora na kojem djeluje Turistička zajednica;
- (s) radi na pripremi i implementaciji događaja (event) od važnosti za Grad;
- (t) obavlja i druge poslove propisane Zakonom o turističkim zajednicama i unaprijeđenju turizma u HNK-a (Narodne novine HNŽ, broj: 5/2000 i 3/2022), ovom odlukom, statutom ili drugim propisom.

III - ORGANI TURISTIČKE ZAJEDNICE

Član 6.

(Organi Turističke zajednice)

Organi Turističke zajednice su:

- a) Skupština,
- b) Nadzorni odbor,
- c) Turističko vijeće,
- d) Predsjednik Turističke zajednice.

Statutom Turističke zajednice može se predvidjeti osnivanje i drugih organa.

Članovi organa odgovorni su za zakonito i savjesno obavljanje svojih dužnosti.

Član 7.

(Mandat članova organa Turističke zajednice)

Mandat članova organa Turističke zajednice je 4 (četiri) godine.

U slučaju prestanka mandata člana organa prije isteka vremena na koje je imenovan, novi član se imenuje na vrijeme do isteka mandata na koji je izabran prethodnik.

Član 8.

(Skupština Turističke zajednice)

Skupština Turističke zajednice (u daljem tekstu: Skupština) je najviši organ upravljanja u Turističkoj zajednici.

Obavezni članom Turističke zajednice Grada Konjica postaje svaka pravna i fizička osoba koja na području grada Konjica ima svoje sjedište ili podružnicu, pogon, filijalu i sl. (u daljem tekstu: poslovna jedinica), a koja ostvaruje prihod obavljanjem ugostiteljskih i turističkih, te sa turizmom neposredno povezanih djelatnosti.

Skupština se održava najmanje jedanput godišnje.

Član 9.

(Pripremne radnje za Skupštinu Turističke zajednice)

Skupština donosi Statut uz prethodnu saglasnost Gradskog vijeća Konjic.

Pripremne radnje za osnivanje Turističke zajednice, izradu teksta Statuta Turističke zajednice i druge akte kao i sazivanje osnivačke Skupštine Turističke zajednice obavlja gradska služba za privredu, poljoprivredu i lokalni razvoj Grada Konjica (u daljem tekstu: Služba).

Skupština će donijeti sve potrebne akte koji su potrebni za upis Turističke zajednice u Registar Ministarstva.

Član 10.

(Nadležnosti skupštine Turističke zajednice)

Nadležnosti Skupštine su da:

- a) donosi statut Turističke zajednice,
- b) donosi poslovnik o radu Skupštine Turističke zajednice,
- c) imenuje i razrješava članove Nadzornog odbora Turističke zajednice,
- d) imenuje i razrješava članove Turističkog vijeća Turističke zajednice,
- e) donosi godišnji program rada i godišnji finansijski plan Turističke zajednice,
- f) usvaja godišnje izvještaj o radu i godišnji finansijski izvještaj Turističke zajednice,
- g) donosi odluku o osnivanju i organizaciji turističkog ureda, kao stručne službe Turističke zajednice,
- h) donosi odluku o izvještajima koje podnose Predsjednik, Nadzorni odbor i Turističko vijeće,
- i) donosi odluke i rješava druga pitanja kada je to predviđeno propisima i statutom,
- j) priprema i podnosi Gradskom vijeću plan i program rada i najmanje jednom godišnje priprema i podnosi izvještaj o radu i finansijski izvještaj.

Član 11.

(Nadzorni odbor Turističke zajednice)

Nadzorni odbor nadzire:

- a) vođenje poslova Turističke zajednice,
- b) materijalno i finansijsko poslovanje i raspolaganje sredstvima,
- c) izvršenje i provedbu programa rada i finansijskog plana.

Nadzorni odbor o izvršenom nadzoru podnosi izvještaj Turističkom vijeću i Skupštini Turističke zajednice. Nadzorni odbor provodi nadzor iz stava 1. ovog člana najmanje četiri puta godišnje.

Član 12.

(Članovi Nadzornog odbora Turističke zajednice)

Nadzorni odbor Turističke zajednice čine predsjednik i dva člana koje imenuje i razrješava Skupština, od kojih dva člana predlaže osnivač.

Član Nadzornog odbora ne može biti član Turističkog vijeća niti Skupštine.

Nadzorni odbor iz redova svojih članova bira predsjednika.

Nadzorni odbor donosi poslovnik o svom radu.

Član 13.

(Turističko vijeće Turističke zajednice)

Turističko vijeće je izvršni organ Skupštine.

Turističko vijeće obavlja poslove utvrđene Zakonom, ovom odlukom, statutom ili drugim propisom i za svoj rad odgovara Skupštini.

Član 14.

(Nadležnost Turističkog vijeća Turističke zajednice)

Turističko vijeće nadležno je da:

- a) provodi odluke i zaključke Skupštine,
 - b) predlaže skupštini godišnji program rada i finansijski plan Turističke zajednice, te godišnji izvještaj o radu i finansijski izvještaj Turističke zajednice,
 - c) podnosi Skupštini izvještaj o svom radu najmanje jedanput godišnje,
 - d) upravlja imovinom Turističke zajednice, u skladu sa Zakonom, ovom odlukom, statutom ili drugim propisom, te u skladu sa programom rada i finansijskim planom,
 - e) donosi opće akte za stručnu službu Turističke zajednice,
 - f) imenuje i razrješava direktora turističkog ureda na osnovu javnog konkursa, a koji se bira na mandat od četiri godine,
 - g) utvrđuje granice ovlaštenja za zastupanje i raspolaganje finansijskim sredstvima Turističke zajednice,
 - h) donosi poslovnik o radu,
 - i) obavlja i druge poslove utvrđene Zakonom, ovom odlukom, statutom ili drugim propisom.
- Poslove i zadatke iz stavka 1. alineje b), e) i f) Turističkom vijeću priprema i predlaže Predsjednik Turističke zajednice.

Član 15.

(Sastav i odlučivanje Turističkog vijeća Turističke zajednice)

Turističko vijeće ima predsjednika i 6 (šest) članova.

Članove Turističkog vijeća bira Skupština iz reda obaveznih članova Turističke zajednice, vodeći računa o teritorijalnoj zastupljenosti i o zastupljenosti djelatnosti u turizmu (pružatelji ugostiteljskih usluga, putničke agencije i dr.).

Turističko vijeće je odgovorno Skupštini Turističke zajednice.

Turističko vijeće može pravovaljano odlučivati ukoliko je na sjednici prisutno više od polovine članova vijeća, a odlučuje većinom glasova prisutnih članova.

Član 16.

(Predsjednik Turističke zajednice)

Predsjednik Turističke zajednice predstavlja i zastupa Turističku zajednicu.

Predsjednika Turističke zajednice na prijedlog nadležne Službe imenuje i razriješava skupština Turističke zajednice uz prethodnu suglasnost Gradskog vijeća.

Predsjednik Turističke zajednice je i predsjednik Turističkog vijeća.

Predsjednik Turističke zajednice saziva i predsjedava Skupštinom Turističke zajednice i saziva i predsjedava sjednicama Turističkog vijeća.

IV-FINANSIRANJE TURISTIČKE ZAJEDNICE

Član 17.

(Prihodi Turističke zajednice)

Prihodi Turističke zajednice su:

- a) prihodi od boravišne takse i turističke članarine, u skladu sa Zakonom,
- b) prihodi iz budžeta Grada i budžeta Kantona,
- c) prihodi od obavljanja djelatnosti iz člana 37. Zakona,
- d) prihodi od dobrovoljnih priloga i darova,
- e) prihodi iz drugih izvora.

Pored izvora finansiranja navedenih u prethodnom stavu, poslovanje ili pojedine aktivnosti Turističke zajednice mogu se finansirati i dodatnim sredstvima koja osiguravaju njihovi članovi i druge zainteresirane organizacije.

V-AKTI TURISTIČKE ZAJEDNICE

Član 18.

(Akti Turističke zajednice)

Akti Turističke zajednice su statut i drugi opći akti kojima se uređuju odnosi u Turističkoj zajednici.

Član 19.

(Statut Turističke zajednice)

Prava i obaveze Turističke zajednice utvrđuju se zakonom i statutom Turističke zajednice.

Statut Turističke zajednice sadrži odredbe o

- a) nazivu i sjedištu,
- b) djelatnosti Turističke zajednice,
- c) zadacima Turističke zajednice,
- d) pravima, obavezama i odgovornosti članova,
- e) načinu predstavljanja i zastupanja Turističke zajednice,
- f) djelokrugu, organizaciji, načinu izbora i opoziva, mandatu te odgovornosti članova organa Turističke zajednice,
- g) načinu odlučivanja u Turističkoj zajednici i organima Turističke zajednice,
- h) načinu ostvarivanja javnosti rada,
- i) načinu donošenja statuta i drugih općih akata,
- j) imovini, načinu sticanja imovine i raspolaganju imovinom,
- k) postupku sa imovinom u slučaju prestanka Turističke zajednice,
- l) drugim pitanjima od značaja za djelovanje Turističke zajednice.

Skupština Turističke zajednice donosi statut i odluku o izmjenama i dopunama statuta uz prethodnu saglasnost Gradskog vijeća.

Statut Turističke zajednice i njegove izmjene i dopune objavljuju se u Službenom glasniku Grada Konjica.

VI - PRESTANAK POSTOJANJA TURISTIČKE ZAJEDNICE

Član 20.

(Prestanak postojanja Turističke zajednice)

Turistička zajednica prestaje postojati na osnovu:

- a) odluke Skupštine o prestanku Turističke zajednice uz saglasnost Osnivača,
- b) odlukom Osnivača o zabrani djelovanja Turističke zajednice.

Odluku iz stava 1. tačke b) ovog člana, Osnivač donosi iz sljedećih razloga:

- a) ako Turistička zajednica donosi opće akte suprotno Zakonu, ovoj odluci, statutu ili drugom propisu ili zbog povreda zakona i drugih propisa,

- b) kada se u Turističkoj zajednici ne održe izbori za novu Skupštinu, u skladu sa Zakonom, ovom odlukom, statutom ili drugim propisom.
- c) kada se ni u roku od 60 dana od dana provedenih izbora ne konstituiše Skupština Turističke zajednice,
- d) ako ne izvrši mjere koje naloži osnivač.

VII-PRIJELAZNE I ZAVRŠNE ODREDBE

Član 21.

(Troškovi osnivanja)

Troškove osnivanja Turističke zajednice snosi Osnivač.

Predsjednik Turističke zajednice podnosi prijavu za upis u sudski registar u roku od 15 dana od dana održavanja osnivačke Skupštine.

Član 22.

(Primjena Zakona)

Na pitanja koja nisu uređena odredbama ove odluke shodno se primjenjuju odredbe Zakona o turističkim zajednicama i unapređenju turizma u Hercegovačko-neretvanskom kantonu (Narodne novine HNK, broj: 5/2000 i 3/2022).

Funkcije navedene u organima Turističke zajednice odnose se na oba spola.

Član 23.

(Stupanje na snagu)

Odluka stupa na snagu danom objavljivanja u "Službenom glasniku Grada Konjica" i ima se objaviti na Oglasnoj tabli Grada Konjica.

PREDSJEDNIK
GRADSKOG VIJEĆA
Kenan Greda